

RECUPEREMOS OS SALARIOS, A PAGA DE ANTIGÜIDADE E O ACORDO DE EMPREGO

30 de xaneiro de 2018

Quen cala outorga. Se calamos seremos cómplices dun roubo do que nós mesmos fomos vítimas. Móvete, reivindica.

CARTOS E DESPREZO

CARTOS 1. ORZAMENTOS

Expoñémosvos unhas cantidades moi significativas, que debemos ter en conta para entender os nosos problemas:

| | |
|-----------------------------|---------------|
| Total Orzamento Consellería | 2.323.732.731 |
| Gastos Persoal (GP) 2018 | 1.361.381.243 |
| Concertada | 269.759.664 |
| GP Profesorado Pública | 1.262.073.000 |

Os denostados, por moitos, concertos educativos (nos que non van incluídos somentes os salarios en pago delegado) supoñen un 11'61% dos orzamentos globais da Consellería, mentres que os gastos de persoal do profesorado de ensino público representan o 54'31 %.

Os gastos totais do ensino concertado supoñen un 21'37 % do que se gasta no profesorado do ensino público, pero os docentes do ensino concertado educamos ao 27% do alumnado galego.

CARTOS 2. Paga extraordinaria de antigüidade na empresa (PEA)

A un traballador de Infantil-Primaria correspóndenlle pola paga de antigüidade aproximadamente **doce mil euros** e a un de ESO **catorce mil**. Con 1 millón de euros abóase a paga de antigüidade de aproximadamente 85 persoas. Un incremento nos concertos educativos de un **1% suporía unha cantidade de 2.697.596,64€** cos que se pode ría aboar a paga a aproximadamente **229 traballadores**.

Tendo en conta o dito máis arriba, é tanto pedir un incremento dun 1% nos concertos educativos destinados ao aboamento da PEA?

CARTOS 3. Salarios

Se aplicamos o IPC, coas correspondentes subidas e baixadas, un mestre desde 2011 *perdeu* **26.958,96€** e un profe **30.478,84€**. E estamos a falar a trienio cero. Esas cantidades son superiores aos nosos salarios anuais 26.299,56€ (mestres) e 30.302,44€ (profes). Así pois, neste caso **homes e mulleres traballamos un ano gratis para a Consellería.**

Hoxe en día un mestre da concertada aínda gaña 514,36€ menos do que gañaba en 2009 e un profe 615'18€

A isto debemos poñerlle remedio. Esiximos que a Consellería se sente a negociar cos sindicatos un **ACORDO RETRIBUTIVO** e consensuemos uns prazos e cantidades realistas para recuperar o poder adquisitivo mediante o incremento progresivo do Complemento Retributivo da Comunidade Autónoma (CRCA), de exclusiva competencia da Consellería.

CARTOS 4. Conclusión necesaria: resulta imprescindible un incremento das partidas orzamentarias dos concertos educativos

Por todo o antedito non supón ningún dislate demandar, **E DEMANDAMOS, que se incrementen os concertos educativos cuns obxectivos finalistas:**

- **INCREMENTAR os nosos salarios** para recuperar o poder adquisitivo.
- **O ABOAMENTO da PEA** aos traballadores que cumpriron os 25 anos na súa empresa.

Haberá quen se bote as mans á cabeza porque demandamos máis cartos para os concertos pero que nos digan os alporizados como, se non, podemos obter o solicitado: **A RECUPERACIÓN DOS NOSOS SALARIOS.**

DESPREZO AOS TRABALLADORES DA CONCERTADA. Acordo de Mantemento de Emprego (AME)

Entre 1990 e 2009 asináronse acordos pola Administración, patronal e sindicatos que permitiron recolocar a centos de traballadores que perderan o seu posto de traballo a causa da supresión de unidades concertadas.

Desde 2009 a Consellería négase a negociar un acordo de recolocación. Por cartos? Ao principio pensamos que este era o motivo pois os acordos asinados entre 1999 e 2009 incluían unha cláusula en virtude da cal os traballadores apuntados na Lista de recolocación percibirían da Consellería unha indemnización de 1'5 veces a cantidade pagada polo FOGASA, pero **a proposta que os sindicatos lles fixemos NON INCLUÍA esta cláusula, polo que apenas ía ter custe para a Consellería.** A resposta que se nos deu na reunión co conselleiro, quen por certo demostrou unha completa ignorancia respecto a este tema, foi: “ **non somos unha axencia de recolocación**”.

Non son cartos é desprezo cara os traballadores da concertada, quizá porque traballamos e calamos. Somos eficaces e non protestamos, os traballadores perfectos. Non lles importa que perdamos os nosos postos de traballo. Dálles igual o que nos suceda a nós e as nosas familias.

Ademais a Consellería dinos que tamén se perden postos de traballo no ensino público e non se recoloca a ninguén, argumento magnífico, pois é tanto como dicirnos que aquí se reparten labazadas a tirios e troianos. E a aguantarse.

Pero o caso é que non teñen razón, ou só unha pouca. Si é certo que hai interinos que se poden quedar un ano (ou máis) sen traballar, pero non é menos certo que a menos que non cumpran cos requisitos que se lles esixen, permanecen nunha lista da que a Consellería vai tirando para cubrir vacantes. Algo moi parecido ao que nós solicitamos.

Non nos enganemos, a auténtica razón pola que a Consellería non negocia un AME é porque non quere negociar cun colectivo ao que despreza. PORQUE NON PROTESTAMOS? POIS PROTESTEMOS. TRÁTASE DO NOSO FUTURO E O DOS NOSOS FILLOS.

En marzo todos os sindicatos da concertada iniciaremos unha serie de **mobilizacións para as que te NECESITAMOS**. Queremos que esteas ao noso lado para loitar polo que nos corresponde, **PARA RECUPERAR OS NOSOS SALARIOS E OS NOSOS DEREITOS**. Terémoste informado. E xa sabes:

Xuntos podemos máis

**SINDICATO NACIONAL DE ENSINO PRIVADO
DA FeSP-UGT ENSINO**